

Na osnovu člana 15. stav (2) i člana 30. st. (10) i (11) Zakona o naftnim derivatima u Federaciji Bosne i Hercegovine ("Službene novine Federacije BiH", broj 52/14), federalni ministar energije, rudarstva i industrije, u saradnji sa federalnim ministrom financija, donosi

PRAVILNIK

O DOSTAVLJANJU PODATAKA IZ NAFTNOG SEKTORA

DIO PRVI - OSNOVNE ODREDBE

Član 1. (Predmet pravilnika)

Pravilnikom o dostavljanju podataka iz naftnog sektora (u daljem tekstu: Pravilnik) na području Federacije Bosne i Hercegovine propisuje se način dostavljanja podataka o mjesečnim i godišnjim prometovanim količinama naftnih derivata razvrstanih po vrsti naftnog derivata, tarifnom broju, dobavljaču i zemlji porijekla, podataka koji se odnose na plasman naftnih derivata na tržištu Federacije Bosne i Hercegovine razvrstanih po vrsti naftnog derivata, tarifnom broju i dobavljaču, sadržaj i način dostavljanja podataka o uplatama takse, rokovi za dostavljanje podataka i kontrola izmirivanja obaveza po osnovu takse.

DIO DRUGI - PODACI IZ NAFTNOG SEKTORA

POGLAVLJE I. PODACI O PROMETOVANIM KOLIČINAMA

Član 2. (Evidencije o prometovanim količinama)

Energetski subjekti koji obavljaju energetske djelatnosti u sektoru naftne privrede iz člana 9. tač. a), b), d), e) i f) i kupci iz člana 2. g) Zakona o naftnim derivatima u Federaciji Bosne i Hercegovine (u daljem tekstu: Zakon) dužni su voditi evidencije o mjesečnim i godišnjim prometovanim količinama naftnih derivata razvrstanih po vrsti naftnog derivata, tarifnom broju, dobavljaču i zemlji porijekla i utvrđene količine evidentirati u tabelu/le koje se nalaze u Prilogu 1. ovog Pravilnika (Tabela 1., Tabela 1.1., Tabela 1.2. i Tabela 1.3.), i čini njegov sastavni dio.

Član 3. (Prilog 1.)

Popunjenu tabelu/le iz člana 2. ovog Pravilnika od strane ovlaštenog lica i ovjerenu pečatom pravnog lica energetski subjekti i kupci dužni su dostavljati Federalnom ministarstvu energije, rudarstva i industrije (u daljem tekstu: Ministarstvo), mjesečno, i to do 25. u mjesecu, za prethodni mjesec i godišnje do 25. januara tekuće godine, za prethodnu godinu.

POGLAVLJE II. PODACI O PLASMANU NAFTNIH DERIVATA

Član 4. (Evidencije o plasiranim količinama)

(1) Energetski subjekti koji obavljaju energetske djelatnosti u sektoru naftne privrede iz člana 9. tač. a), b), d), e) i f) dužni su voditi evidenciju o podacima koji se odnose na plasman naftnih derivata na tržištu Federacije Bosne i Hercegovine razvrstanih po vrsti naftnog derivata, tarifnom broju i dobavljaču i utvrđene količine evidentirati u tabelu/le koje se nalaze u Prilogu 2. ovog Pravilnika (Tabela 2., Tabela 2.1., Tabela 2.2., Tabela 2.3., Tabela 2.4. i Tabela 2.5.), i čini njegov sastavni dio.

(2) Kupci iz člana 2. g) Zakona koji koriste naftne derivate u količini većoj od 100 tona/godišnje, dužni su voditi evidencije o stanju zaliha naftnih derivata i utvrđene količine evidentirati u tabelu koja se nalaze u Prilogu 2. ovog Pravilnika (Tabela 2.5.).

Član 5. (Prilog 2.)

Popunjenu tabelu/le iz člana 4. ovog Pravilnika od strane ovlaštenog lica i ovjerenu pečatom pravnog lica energetski subjekti i kupci dužni su dostavljati Ministarstvu, mjesečno, i to do 25. u mjesecu za prethodni mjesec i godišnje, do 25. januara tekuće godine, za prethodnu godinu.

DIO TREĆI - TAKSA ZA USPOSTAVU REZERVI NAFTNIH DERIVATA

POGLAVLJE I. UPLATA TAKSE

Član 6. (Taksa)

(1) Taksa za uspostavu rezervi naftnih derivata iz člana 30. Zakona plaća se na promet naftnih derivata koji služe za krajnju potrošnju u visini od 0,01 KM po litru naftnih derivata, uključujući i LPG koji se koristi u motorima sa unutrašnjim sagorjevanjem.

(2) Taksa iz stava (1) ovog člana je namjenski prihod koji se do 25. u mjesecu, za prethodni mjesec, uplaćuje na Račun javnih prihoda Budžeta Federacije Bosne i Hercegovine u skladu sa Pravilnikom o načinu uplate javnih prihoda budžeta i vanbudžetskih fondova na teritoriji Federacije Bosne i Hercegovine ("Službene novine Federacije BiH", br. 35/13, 53/13, 63/13, 93/13, 103/13, 11/14, 19/14, 46/14, 60/14, 65/14, 105/14, 20/15, 44/15, 53/15, 73/15, 96/15 i 102/15).

Član 7. (Obveznici uplate takse)

Obveznici uplate takse za uspostavu rezervi naftnih derivata su energetske subjekti koji se bave prometom naftnih derivata na malo i kupci koji naftne derivate koriste: za pretvaranje u toplotnu energiju, ili pretvaranje u mehaničku energiju i posjeduju internu stanicu za snabdjevanje gorivom, ili ih koristi u tehnološkom procesu proizvodnje.

POGLAVLJE II. EVIDENCIJA

Član 8. (Evidencije o izvršenim uplatama takse)

Energetski subjekti i kupci iz člana 7. ovog Pravilnika dužni su voditi evidenciju o izvršenim uplatama takse na tabelama koje se nalaze u Prilogu 3. ovog Pravilnika (Tabela 3. i Tabela 3.1.), i čini njegov sastavni dio.

Član 9. (Prilog 3.)

(1) Popunjenu tabelu/le iz člana 8. ovog Pravilnika od strane ovlaštenog lica i ovjerenu pečatom pravnog lica energetske subjekti i kupci dužni su dostavljati Ministarstvu, Poreznoj upravi Federacije Bosne i Hercegovine i privrednom društvu "Operator - Terminali Federacije" d.o.o. Sarajevo, mjesečno, i to do 25. u mjesecu, za prethodni mjesec i godišnje, do 25. januara tekuće godine, za prethodnu godinu.

(2) Pri preračunu naftnih derivata iz kilograma u litre uzima se prosječna specifična težina utvrđena Odlukom o kvalitetu tečnih naftnih goriva ("Službeni glasnik BiH", br. 27/02, 28/04, 16/05, 14/06, 22/07, 101/08, 71/09, 58/10 i 73/10), a za ostale naftne derivate koji nisu sadržani u navedenoj odluci pri preračunu će se primjenjivati koeficijenti za preračunavanje sadržani u tabeli koja se nalazi u Prilogu 4. ovog Pravilnika (Tabela 4.), i čini njegov sastavni dio.

(3) Izuzetno, energetske subjekti i kupci iz stava (1) ovog člana, dužni su na zahtjev Ministarstva dostaviti podatke nakon ukazane potrebe i vanredno, u drugim rokovima.

POGLAVLJE III. KONTROLA I PRAĆENJE PRAVILNOG OBRAČUNA I UPLATE TAKSE

Član 10. (Kontrola i rješenje o naplati)

(1) U skladu sa članom 30. stav (9) Zakona, nadzor i kontrolu nad primjenom Zakona u dijelu takse vrši Porezna uprava Federacije Bosne i Hercegovine.

(2) Privredno društvo "Operator - Terminali Federacije" d.o.o. Sarajevo je obavezno da, na osnovu dostavljene evidencije iz čl. 8. i 9. ovog Pravilnika, sačinjava zbirne izvještaje i dostavlja ih Ministarstvu i Poreznoj upravi Federacije Bosne i Hercegovine u (daljem tekstu: Porezna uprava), najkasnije do kraja mjeseca za prethodni mjesec.

(3) Porezna uprava dužna je da u skladu sa Zakonom o Poreznoj upravi Federacije Bosne i Hercegovine i Zakonom, vrši kontrolu obračuna, uplate, i razreza navedene takse, kao i kamate radi neblagovremenog plaćanja, da vodi postupke prinudne naplate, povrata, praćenja zastare, te vođenje upravnih postupaka i upravnih sporova u skladu sa zakonom.

Član 11.
(Žalba)

(1) Na rješenje Porezne uprave kojim se utvrđuje dodatno razrezana porezna obaveza u postupku kontrole ili na poreznu prijavu koju je Porezna uprava podnijela u ime poreznog obveznika, porezni obveznik ima pravo žalbe.

(2) Žalba se neposredno predaje ili šalje poštom organu koji je donio prvostepeno rješenje u roku od osam (8) dana od dana prijema prvostepenog rješenja.

(3) Kad prvostepeni organ nađe da je podnesena žalba dopuštena, blagovremena i izjavljena od ovlaštene osobe, a pobijeno rješenje nije zamijenio novim rješenjem, dužan je bez odgađanja, a najkasnije u roku od osam (8) dana od dana prijema žalbe, poslati žalbu Federalnom ministarstvu finansija - Federalnom ministarstvu financija na rješavanje.

(4) Federalno ministarstvo finansija - Federalno ministarstvo financija rješava po žalbi u roku od trideset (30) dana od dana prijema žalbe od prvostepenog organa.

(5) Žalba ne odlaže izvršenje rješenja.

Član 12.
(Tužba)

(1) Protiv rješenja drugostepenog organa, dopuštena je tužba nadležnom sudu.

(2) Tužba nadležnom sudu u Federaciji Bosne i Hercegovine podnosi se u roku od trideset (30) radnih dana od dana prijema rješenja drugostepenog organa.

(3) Podnošenje tužbe nadležnom sudu u Federaciji Bosne i Hercegovine ne odlaže izvršenje rješenja Porezne uprave.

DIO ČETVRTI - ZAVRŠNE ODREDBE

Član 13.
(Stupanje na snagu)

Ovaj pravilnik stupa na snagu narednog dana od dana objavljivanja u "Službenim novinama Federacije BiH".

Broj 05-02-3004/15
08. februara 2016. godine
Mostar

Ministar
Nermin Džindić, s. r.